

दिनांक : 01.09.2026

समय : 18.45 बजे

- प्रधानमंत्री नरेन्द्र मोदी एस.सी.ओ. शिखर सम्मेलन मांय आतंकवाद रा ईको सिस्टम अर फंडिंग ने खत्म करण री अरज कीनी।
- पाणी बचावण अर इण रा बेहतर प्रबंधन रा बारा मांय विचार करण सारू नई दिल्ली मांय आज दो दिन रो शिखर सम्मेलन सुरू व्ह्यो।
- प्रदेश मांय जर्जर अर असुरक्षित स्कूल भवन अर कक्षा काम नी लेवण रा हुकम दिया ज्या।
- मलेशिया मांय व्ही लेक्रोज चैंपियनशिप मांय भारत री महिला टीम कांसा रो तमगो जीत्यो— टीम मांय राजस्थान रा जनजातीय हलकां री नौ खिलाड़ियां रो शानदार प्रदर्शन।

000

प्रधानमंत्री नरेन्द्र मोदी 26वां शंघाई सहयोग संगठन-एससीओ शिखर सम्मेलन मांय आतंकवाद रे खिलाफ करडो संदेश दीनो है। किर्गीज गणराज्य री राजधानी बिश्केक मांय राख्खी ज्या सम्मेलन मांय श्री मोदी आतंकवाद रा ईको सिस्टम अर रकम री सप्लाई बंद करण री अरज कीनी। प्रधानमंत्री सगळा सदस्य देशां ऊं आतंकवाद रे खिलाफ दोवड़ा मानदंडां ने खारिज करण बाबत कह्यो। वे ज़ोर दे र कह्यो के आतंकवाद इंसानियत सारू गंभीर चुनौती है, जो किण ई देश री रणनीतिक सम्पत्ति नी व्हे सके है। प्रधानमंत्री कह्यो के युद्ध अर लड़ाई रो हल बातचीत अर कूटनीति रे ज़रिये ही व्हेवणो चाहिजे। प्रधानमंत्री कह्यो के भारत बाज़ारां ने जोड़बा, कारोबार ने बधावो देवण वाळी अर विकास रा नुवा गेला खोलण वाळी सगळी कोशिशों री हिमायत करे है। सम्मेलन पाछे प्रधानमंत्री मोदी दो दिन री किर्गिस्तान यात्रा पूरी कर र बिश्केक ऊं नई दिल्ली सारू रवाना व्हे गया। एक वीडियो संदेश मांय प्रधानमंत्री चालू माली साल री पहली तिमाही मांय देश री जीडीपी मांय बधोतरी री रेट 7 दशमलव 8 फीसदी रेहवण परां जनता ने बधाई दीनी।

000

सुप्रीम कोर्ट 20 ऊं 25 जुलाई बीचे देशभर मांय नीट पेपर लीक मुद्दा ने ले र विद्यार्थियां कानी ऊं करी ज्या प्रदर्शनां ऊं जुड़ी सगळी एफ.आई.आर. बंद करण सागे ऐड़ा मामलां मांय आगे जांच नी करण रो हुकम दीनो है। अदालत राज्यां अर केन्द्र रा राज वाळा प्रदेशां ने ई मियाद मांय करी ज्या प्रदर्शन ऊं जुड़ी कोई नुवी एफ.आई.आर. दर्ज नी करण बाबत ई कह्यो। हालांकि मुख्य न्यायाधीश सूर्यकांत, न्यायमूर्ति जॉयमाल्या बागची अर न्यायमूर्ति वी० मोहना री पीठ जंतर-मंतर सामी प्रदर्शन मांय मौजूद दो हजार 873 जणां रे खिलाफ जांच जारी राखण री मंजूरी दीनी है, ज्यां रे खिलाफ पैली ई संगीन आपराधिक मामला दर्ज है। ई बीचे, केन्द्रीय मंत्री जे.पी. नड्डा भरोसो दिरायो के नीट पेपर लीक मुद्दा ने ले र प्रदर्शन करण वाळा विद्यार्थियां रे खिलाफ दर्ज मामला पाछा ले र वां रे खिलाफ कोई करडी कार्रवाई नी करी जावेला।

000

देश मांय पाणी बचावण अर इण रा बेहतर प्रबंधन सारू जल शक्ति मंत्रालय री ओर ऊं आज नई दिल्ली मांय दो दिन रो शिखर सम्मेलन सुरू व्ह्यो। जलशक्ति मंत्री सी.आर. पाटिल बतायो के सम्मेलन मांय न्यारा-न्यारा राज्यां अर महकमां रा अहलकारां सागे पाणी रा बेहतर प्रबंधन सारू कार्य प्रणालियां अर चुनौतियां रा हल ऊं जुड़्यो विचार कर्यो जा रह्यो है। सम्मेलन मांय विचार सारू पाणी भेळो करण, जनता री भागीदारी, कैच द रेन अर जल जीवन मिशन 2.0 रा तैत पीवण रा पाणी री पूर्ति ऊं जुड़ी योजनावां समेत न्यारा-न्यारा मुद्दा शामिल करी ज्या है। राज्य रा जल ससाधन मंत्री सुरेश सिंह रावत बतायो के सम्मेलन मांय राजस्थान मांय पाणी री हिफाजत रा बारा मांय ई विचार कर र रोडमैप बणायो जावेला।

000

प्रदेश मांय नगरीय निकाय चुनाव सारू उम्मीदवारां कानी ऊं दाखिल करी ज्या नामपानां री आज जांच करी ज्यी। राज्य निर्वाचन आयोग रे मुजब 10 हजार 245 वार्ड सारू 55 हजार ऊं बत्ता उम्मीदवार 66 हजार 600 ऊं बत्ता पर्चा दाखिल कीना। सब ऊं बत्ता 3 हजार 800 ऊं ज्यादा नामपाना जयपुर जिला मांय भरी ज्या। ई सागे ई उम्मीदवारां कानी ऊं जनसम्पर्क रो काम तेज कर

दियो ज्यो है। भाजपा अर कांग्रेस समेत न्यारी-न्यारी सियासी पार्टियां रा उम्मीदवारां सागे ई निर्दलीय उम्मीदवारां री मौजूदगी मुकाबलां ने रोचक बणा रह्या है। केई ठौड़ां बागी उम्मीदवारां री मान-मनव्वल री कवायद ई करी जा रही है। 3 सितम्बर ने दोपहर 3 बज्यां ताई नाम पाछा लिया जा सके है। ई पाछे राज्य निर्वाचन आयोग री ओर ऊं उम्मीदवारां ने चुनाव चिन्ह आवंटित कर्या जावेला। न्यारा-न्यारा हलकां मांय वोट 9 अर 11 सितम्बर ने पड़ेला। निकाय चुनाव प्रक्रिया ठीक तरीका ऊं करावण सारू चुनाव ड्यूटी मांय लगायोड़ा कर्मचारियां ने सिखावण री जा रही है। आज पाली मांय दो दिन रो सिखावण शिविर सरू व्ह्यो। ई बीचे नगर निकाय चुनाव मांय जनता री बत्ती ऊं बत्ती भागीदारी तैय करण सारू चलाया जा रह्या मतदाता जागरुकता अभियान रा तैत न्यारा-न्यारा आयोजन राख्या जा रह्या है। आज अजमेर मांय स्वीप टीम री ओर ऊं सामुदायिक स्वास्थ्य केन्द्र मांय मतदाता जागरुकता कार्यक्रम राखी ज्यो। कोटपूतली रा गंगासागर तळाव मांय दिया जलावण रो कार्यक्रम राखी ज्यो है। बालोतरा मांय रोचक सांप-सीढ़ी पोस्टर रे जरिए खेल-खेल मांय वोट देवण रो महत्त्व बतायो जा रह्यो है।

000

मुख्य सचिव वी. श्रीनिवास प्रदेश मांय पड़बा री शंका वाळा अर असुरक्षित स्कूल भवन अर कक्षा कक्ष काम नी लेवण रा हुकम दीना है। मुख्य सचिव स्कूल भवनां री हिफाजत रा बारा मांय आज जयपुर मांय राखी ज्यी मीटिंग मांय बोल रह्या हा। मुख्य सचिव उच्च शिक्षा विभाग रा अहलकारां ने संस्थान भवनां री हिफाजत ऊं जुड़ी लगातार निगराणी अर जांच करावण सारू कह्यो। वे स्कूलां मांय पीवण रो साफ पाणी मुहैया करावण माथे ई खास जोर दीनो। मीटिंग मांय स्कूल शिक्षा रा अतिरिक्त मुख्य सचिव राजेश यादव बतायो के प्रदेश री 65 हजार ऊं बत्ती स्कूलां रा तकनीकी सर्वे मांय 3 हजार ऊं बत्ता जर्जर भवन अर 83 हजार ऊं बत्ता पड़बा री हालत वाळा कक्षा कक्षां री पिछाण करीजी है, ज्यां ने काम लेवण माथे रोक लगा दीरीजी है। श्री यादव बतायो के आई.आई.टी. जोधपुर अर जयपुर रा एम.एन.आई.टी. रा जाणकारां री टीम कानी ऊं सरकारी स्कूल भवनां री स्वतंत्र तकनीकी सुरक्षा जांच करी जा रही है।

000

मलेशिया मांय खेती ज्यी लेक्रोज चैंपियनशिप मांय भारत री महिला टीम कांसा रो तमगो जीत्यो है। कुआलालंपुर मांय भारत मेजबान मलेशिया ने हरायो, ई पाछे फिलिपींस ने मात दे र सिंगापुर ने 10-9 ऊं हरा र कांसा रो तमगो जीत्यो। भारत री ई जीत मांय उदयपुर अर आरे-सारे रा जनजातीय हलकां री बेटियां रो मोटो योगदान रह्यो। राज्यपाल हरिभाऊ बागडे आ उपलब्धि हासिल करण सारू भारत री महिला लेक्रोज टीम ने बधाई अर शुभकामनावां दीनी है। वां रा संदेश मांय राज्यपाल कह्यो के सीमित साधनां रे बावजूद राजस्थान री बेटियां बेहतरीन खेल रो दरसाव कीनो। मुख्यमंत्री भजनलाल शर्मा ई ई उपलब्धि सारू भारत री होशियार खिलाड़ियां री सराहवणा कीनी है। वां रा संदेश मांय मुख्यमंत्री कह्यो के जनजातीय हलका री खिलाड़ी मेहनत अर ज़बा ऊं देश अर प्रदेश रो नाम रोशन कीनो है।

000

केन्द्र सरकार शक्कर री जमाखोरी अर इण ऊं जुड़ी सट्टेबाजी रोकण सारू शक्कर रा भंडारण री हद चार हजार क्विंटल ऊं घटा र दो हजार क्विंटल कर दीनी है। नुवी हद ई महीना री 15 तारीख ऊं 30 नवंबर ताई लागू रेहवेला। उपभोक्ता मामलात, खाद्य अर सार्वजनिक वितरण मंत्रालय रे मुजब नुवा नियमां रे तैत कोई कारोबारी स्टॉक मिल्यां पाछे 30 दिन ऊं बत्ता बगत ताई तैय हद ऊं बत्ती शक्कर नी राख सकेला।

ई सागे ई सरकार दिसावर ऊं बिना फीस मंगवायी जावण वाळी कच्ची चीनी री प्रोसेसिंग अर बिक्री री समय सीमा मांय ई बदलाव कीनो है। दिसावर ऊं कच्ची शक्कर मंगावण वाळां सारू खरीद री तारीख ऊं दो महीना री मियाद मांय इण ने सफेद शक्कर बणा र देशी बाजार मांय बेचणो जरूरी व्हेला।

000

केन्द्र सरकार कांदा रा सुरक्षित भंडार ऊं देश रा खास शहरां रा बाज़ारां मांय प्याज री पूर्ति सरू कर दीनी है। खाद्य मंत्रालय रे मुजब देश मांय कांदा रा बधता मोल माथे काबू करण सारू कांदा एक्सप्रेस मालगाड़ियां अर ट्रकां रे ज़रिए प्याज री पूर्ति करी जा रही है। मंत्रालय रे मुजब रेलगाड़ियां सागे ई ट्रकां ऊं ई करीब 1 हजार मीट्रिक टन प्याज बाज़ारां मांय भेज्यो जा रह्यो है।

सरकार साफ कीनो है के बफर स्टॉक ऊं प्याज बाजार मांय आयां पाछे इण रा मोल मांय कमी आई है अर आवता दिनां ओ और सस्तो व्हेला।

000

केंद्रीय शिक्षा मंत्री प्रल्हाद जोशी कह्यो है के आर्टिफिशियल इंटेलिजेंस समाज मांय तेजी ऊं जगह बणा रह्यो है। वे आज नई दिल्ली मांय राष्ट्रीय शैक्षिक अनुसंधान और प्रशिक्षण परिषद—एनसीईआरटी रा 66वां स्थापना दिवस समारोह मांय बोल रह्या हा। शिक्षा मंत्री कह्यो के तेजी ऊं व्हे रह्या तकनीकी बदलावां रे मुजब किताबां अर कोर्स मांय बदलाव जरूरी है। वे कह्यो के इण ऊं विद्यार्थियां ने आर्टिफिशियल इंटेलिजेंस ने समझण अर वां ने आत्मविश्वास सागे जिम्मेदारी ऊं काम लेवण मांय मदद मिलेला।

000